

Ifisiyoń

¹ Yih կhat Paulus kī taraf se hai, jo Allāh kī marzī se Masīh Īsā kā rasūl hai.

Main Ifisus Shahr ke muqaddasīn ko likh rahā hūn, unheń jo Masīh Īsā meń īmāndār haiń.

² Khudā hamārā Bāp aur Khudāwand Īsā Masīh āp ko fazl aur salāmatī baķhsheń.

Masīh meń Ruhānī Barkateń

³ Khudā hamāre Khudāwand Īsā Masīh ke Bāp kī hamd-o-sanā ho! Kyońki Masīh meń us ne hameń āsmān par har ruhānī barkat se nawāzā hai. ⁴ Duniyā kī taķhlīq se peshtar hī us ne Masīh meń hameń chun liyā tāki ham muqaddas aur beaib hālat meń us ke sāmne zindagī guzāreń.

Yih kitnī azīm muhabbat thī! ⁵ Pahle hī se us ne faisłā kar liyā ki wuh hameń Masīh meń apne bete-betiyāń banā legā. Yihī us kī marzī aur khushī thī ⁶ tāki ham us ke jalālī fazl kī tamjīd kareń, us muft nemat ke lie jo us ne hameń apne pyāre Farzand meń de dī. ⁷ Kyońki us ne Masīh ke կhūn se hamārā fidyā de kar hameń āzād aur hamāre gunāhoń ko muāf kar diyā hai. Allāh kā yih fazl kitnā wasī hai ⁸ jo us ne kasrat se hameń atā kiyā hai.

Apnī pūrī hikmat aur dānāī kā izhār karke ⁹ Allāh ne ham par apnī poshīdā marzī zāhir kar dī, yānī wuh mansūbā jo use pasand thā aur jo us ne Masīh meń pahle se banā rakhā thā. ¹⁰ Mansūbā yih hai ki jab muqarrarā waqt āegā

to Allāh Masīh meň tamām kāynāt ko jamā kar degā. Us waqt sab kuchh mil kar Masīh ke taht ho jāegā, ɭhāh wuh āsmān par ho yā zamīn par.

¹¹ Masīh meň ham āsmānī bādshāhī ke wāris bhī ban gae hain. Allāh ne pahle se hameň is ke lie muqarrar kiyā, kyońki wuh sab kuchh yoń saranjām detā hai ki us kī marzī kā irādā pūrā ho jāe. ¹² Aur wuh chāhtā hai ki ham us ke jalāl kī satāish kā bāis baneń, ham jinhoń ne pahle se Masīh par ummīd rakhī.

¹³ Āp bhī Masīh meň haiń, kyońki āp sachchāī kā kalām aur apnī najāt kī khushkhabrī sun kar īmān lāe. Aur Allāh ne āp par bhī Rūhul-quds kī muhr lagā dī jis kā wādā us ne kiyā thā. ¹⁴ Rūhul-quds hamārī mīrās kā bayānā hai. Wuh hameň yih zamānat detā hai ki Allāh hamārā jo us kī milkiyat haiń fidyā de kar hameň pūrī maķlasī tak pahuinchāegā. Kyońki hamārī zindagī kā maqsad yih hai ki us ke jalāl kī satāish kī jāe.

Paulus kī Duā

¹⁵ Bhāiyo, maiń Khudāwand Ÿsā par āp ke īmān aur āp kī tamām muqaddasīn se muhabbat ke bāre meň sun kar ¹⁶ āp ke lie Khudā kā shukr karne se bāz nahīń ātā balki āp ko apnī duāoń meň yād kartā rahtā hūń. ¹⁷ Merī ɭhās duā yih hai ki hamāre Khudāwand Ÿsā Masīh kā Khudā aur jalālī Bāp āp ko dānāī aur mukāshafā kī rūh de tāki āp use behtar taur par jān sakeń. ¹⁸ Wuh kare ki āp ke diloń kī āñkheń raushan ho jāeń. Kyońki phir hī āp jān leńge ki yih kaisī ummīd hai jis ke lie us ne āp ko bulāyā hai, ki yih jalālī mīrās kaisī daulat hai jo muqaddasīn ko hāsil

hai, ¹⁹ aur ki ham īmān rakhne wāloñ par us kī qudrat kā izhār kitnā zabardast hai. Yih wuhī behad qudrat hai ²⁰ jis se us ne Masīh ko murdon meñ se zindā karke āsmān par apne dahne hāth biṭhāyā. ²¹ Wahān Masīh har hukmrān, iķhtiyār, quwwat, hukūmat, hān har nām se kahīn sarfarāz hai, kħāh is duniyā meñ ho yā āne wālī duniyā meñ. ²² Allāh ne sab kuchh us ke pāñwoñ ke nīche karke use sab kā sar banā diyā. Yih us ne apnī jamāt kī khātir kiyā ²³ jo Masīh kā badan hai aur jise Masīh se pūrī māmūrī hāsil hotī hai yānī us se jo har tarah se sab kuchh māmūr kar detā hai.

2

Maut se Zindagī Tak

¹ Āp bhī apnī kħatāoñ aur gunāhoñ kī wajah se ruhānī taur par murdā the. ² Kyonki pahle āp in meñ phañse hue is duniyā ke taur-tarīqoñ ke mutābiq zindagī guzārte the. Āp hawā kī kuwwatoñ ke sardār ke tābe the, us rūh ke jo is waqt un meñ sargarm-e-amal hai jo Allāh ke nāfarmān haiñ. ³ Pahle to ham bhī sab un meñ zindagī guzārte the. Ham bhī apnī purānī fitrat kī shahwateñ, marzī aur soch pūrī karne kī koshish karte rahe. Dūsroñ kī tarah ham par bhī fitrī taur par Allāh kā ġhazab nāzil honā thā.

⁴ Lekin Allāh kā rahm itnā wasī hai aur wuh itnī shiddat se ham se muhabbat rakhtā hai ⁵ ki agar che ham apne gunāhoñ meñ murdā the to bhī us ne hameñ Masīh ke sāth zindā kar diya. Hān, āp ko Allāh ke fazl hī se najāt milī hai. ⁶ Jab ham Masīh Īsā par īmān lāe to us ne hameñ

Masīh ke sāth zindā karke āsmān par biṭhā diyā. ⁷ Isā Masīh meń ham par mehrbānī karne se Allāh āne wāle zamānoń meń apne fazl kī lā-mahdūd daulat dikhānā chāhtā thā. ⁸ Kyońki yih us kā fazl hī hai ki āp ko īmān lāne par najāt milī hai. Yih āp kī taraf se nahīn hai balki Allāh kī baķhshish hai. ⁹ Aur yih najāt hameń apne kisī kām ke natīje meń nahīn milī, is lie koī apne āp par fakhr nahīn kar saktā. ¹⁰ Hān, ham usī kī maķhlūq hain jinheń us ne Masīh meń nek kām karne ke lie khalaq kiyā hai. Aur yih kām us ne pahle se hamāre lie taiyār kar rakhe hain, kyońki wuh chāhtā hai ki ham unheń saranjām dete hue zindagī guzāreń.

Masīh meń Ek

¹¹ Yih bāt zahan meń rakheń ki māzī meń āp kyā the. Yahūdī sirf apne lie lafz maķhtūn istemāl karte the agarche wuh apnā ķhatnā sirf insānī hāthon se karwāte hain. Āp ko jo Ģhairyahūdī hain wuh nāmaķtūn qarār dete the. ¹² Us waqt āp Masīh ke bağhair hī chalte the. Āp Isrāīl qaum ke shahrī na ban sake aur jo wāde Allāh ne ahdoń ke zariye apnī qaum se kie the wuh āp ke lie nahīn the. Is duniyā meń āp kī koī ummīd nahīn thī, āp Allāh ke bağhair hī zindagī guzārte the. ¹³ Lekin ab āp Masīh meń hain. Pahle āp dūr the, lekin ab āp ko Masīh ke ķhūn ke wasile se qarib lāyā gayā hai. ¹⁴ Kyońki Masīh hamārī sulah hai aur usī ne Yahūdiyoń aur Ģhairyahūdiyoń ko milā kar ek qaum banā diyā hai. Apne jism ko qurbān karke us ne wuh dīwār girā dī jis ne

unhein alag karke ek dūsre ke dushman banā rakhā thā. ¹⁵ Us ne sharīat ko us ke ahkām aur zawaabit samet mansūkh kar diyā tāki donoñ gurohoñ ko milā kar ek nayā insān khalaq kare, aisā insān jo us meñ ek ho aur sulah-salāmatī ke sāth zindagī guzāre. ¹⁶ Apnī salībī maut se us ne donoñ gurohoñ ko ek badan meñ milā kar un kī Allāh ke sāth sulah karāī. Hān, us ne apne āp meñ yih dushmanī khatm kar dī. ¹⁷ Us ne ā kar donoñ gurohoñ ko sulah-salāmatī kī khushkhabrī sunāī, āp Ĝhairyahūdiyoñ ko jo Allāh se dūr the aur āp Yahūdiyoñ ko bhī jo us ke qarib the. ¹⁸ Ab ham donoñ Masīh ke zariye ek hī Rūh meñ Bāp ke huzūr ā sakte haiñ.

¹⁹ Natīje meñ ab āp pardesī aur ajnabī nahīn rahe balki muqaddasīn ke hamwatan aur Allāh ke gharāne ke haiñ. ²⁰ Āp ko rasūloñ aur nabiyōñ kī buniyād par tāmir kiyā gayā hai jis ke kone kā buniyādī patthar Masīh Īsā khud hai. ²¹ Us meñ pūrī imārat juṛ jātī aur baṛhtī baṛhtī Khudāwand meñ Allāh kā muqaddas ghar ban jātī hai. ²² Dūsroñ ke sāth sāth us meñ āp kī bhī tāmir ho rahī hai tāki āp Rūh meñ Allāh kī sukūnatgāh ban jāeñ.

3

Paulus kī Ĝhairyahūdiyoñ meñ Khidmat

¹ Is wajah se maiñ Paulus jo āp Ĝhairyahūdiyoñ kī ḥātir Masīh Īsā kā qaidī hūn Allāh se duā kartā hūn. ² Āp ne to sun liyā hai ki mujhe āp meñ Allāh ke fazl kā intazām

chalāne * kī khās zimmedārī dī gaī hai. ³ Jis tarah maiñ ne pahle hī mukhtasar taur par likhā hai, Allāh ne khud mujh par yih rāz zāhir kar diyā. ⁴ Jab āp wuh paṛheṇge jo maiñ ne likhā to āp jān leṇge ki mujhe Masīh ke rāz ke bāre meñ kya kyā samajh āī hai. ⁵ Guzare zamānoñ meñ Allāh ne yih bāt zāhir nahīn kī, lekin ab us ne ise Rūhul-quds ke zariye apne muqaddas rasūloñ aur nabiyoñ par zāhir kar diyā. ⁶ Aur Allāh kā rāz yih hai ki us kī khushkhabrī ke zariye Ghairyahūdī Isrāīl ke sāth āsmānī bādshāhī ke wāris, ek hī badan ke āzā aur usī wāde meñ sharīk hain jo Allāh ne Masīh Īsā meñ kiyā hai.

⁷ Maiñ Allāh ke muft fazl aur us kī qudrat ke izhār se khushkhabrī kā khādim ban gayā. ⁸ Agarche maiñ Allāh ke tamām muqaddasīn se kamtar hūn to bhī us ne mujhe yih fazl baḳhshā ki maiñ Ghairyahūdiyoñ ko us lā-mahdūd daulat kī khushkhabrī sunāūn jo Masīh meñ dastyāb hai. ⁹ Yihī merī zimmedārī ban gaī ki maiñ sab par us rāz kā intazām zāhir karūn jo guzare zamānoñ meñ sab chīzon ke Khāliq Khudā meñ poshīdā rahā. ¹⁰ Kyōñki Allāh chāhtā thā ki ab Masīh kī jamāt hī āsmānī hukmrānoñ aur kuwwatoñ ko Allāh kī wasī hikmat ke bāre meñ ilm pahuñchāe. ¹¹ Yihī us kā azlī mansūbā thā jo us ne hamāre Khudāwand Masīh Īsā ke wasile se takmīl tak pahuñchāyā. ¹² Us meñ aur us par īmān rakh kar ham pūrī āzādī aur etamād ke sāth Allāh ke huzūr ā sakte hain. ¹³ Is lie merī āp

* **3:2** Yānī khushkhabrī sunāne.

se guzārish hai ki āp merī musībateñ dekh kar bedil na ho jāeñ. Yih maiñ āp kī khātir bardāsht kar rahā hūn, aur yih āp kī izzat kā bāis haiñ.

Masīh kī Muhabbat

¹⁴ Is wajah se maiñ Bāp ke huzūr apne ghuṭne ṭekṭā hūn, ¹⁵ us Bāp ke sāmne jis se āsmān-o-zamīn kā har khāndān nāmzad hai. ¹⁶ Merī duā hai ki wuh apne jalāl kī daulat ke muwāfiq yih bakhshe ki āp us ke Rūh ke wasile se bātinī taur par zabardast taqwiyat pāeñ, ¹⁷ ki Masīh īmān ke zariye āp ke dilōn meñ sukūnat kare. Hān, merī duā hai ki āp muhabbat meñ jar pakareñ aur is buniyād par zindagī yoñ guzāreñ ¹⁸ ki āp bāqī tamām muqaddasīn ke sāth yih samajhne ke qābil ban jāeñ ki Masīh kī muhabbat kitnī chaurī, kitnī lambī, kitnī ūnchī aur kitnī gahrī hai. ¹⁹ Khudā kare ki āp Masīh kī yih muhabbat jān leñ jo har ilm se kahīn afzal hai aur yoñ Allāh kī pūrī māmūrī se bhar jāeñ.

²⁰ Allāh kī tamjīd ho jo apnī us qudrat ke muwāfiq jo ham meñ kām kar rahī hai aisā zabardast kām kar saktā hai jo hamārī har soch aur duā se kahīn bāhar hai. ²¹ Hān, Masīh Īsā aur us kī jamāt meñ Allāh kī tamjīd pusht-dar-pusht aur azal se abad tak hotī rahe. Āmīn.

4

Badan kī Yagāngat

¹ Chunāñche maiñ jo Khudāwand meñ qaidī hūn āp ko tākīd kartā hūn ki us zindagī ke mutābiq chaleñ jis ke lie Khudā ne āp ko bulāyā hai. ² Har waqt halīm aur narmdil raheñ, sabar

se kām leñ aur ek dūsre se muhabbat rakh kar use bardāshth kareñ. ³ Sulah-salāmatī ke bandhan meñ rah kar Rūh kī yagāngat qāym rakhne kī pūrī koshish kareñ. ⁴ Ek hī badan aur ek hī Rūh hai. Yoñ āp ko bhī ek hī ummīd ke lie bulāyā gayā. ⁵ Ek Khudāwand, ek īmān, ek baptismā hai. ⁶ Ek Khudā hai, jo sab kā wāhid Bāp hai. Wuh sab kā mālik hai, sab ke zariye kām kartā hai aur sab meñ maujūd hai.

⁷ Ab ham sab ko Allāh kā fazl baķhshā gayā. Lekin Masīh har ek ko muķhtalif paimāne se yih fazl atā kartā hai. ⁸ Is lie kalām-e-muqaddas farmātā hai, “Us ne bulandī par charh kar qaidiyon kā hujūm giriftār kar liyā aur ādmiyon ko tohfe die.” ⁹ Ab ġhaur kareñ ki charhnī kā zikr kiyā gayā hai. Is kā matlab hai ki pahle wuh zamīn kī gahrāiyon meñ utrā. ¹⁰ Jo utrā wuh wuhī hai jo tamām āsmānoñ se ūnchā charh gayā tāki tamām kāynāt ko apne āp se māmūr kare. ¹¹ Usī ne apnī jamāt ko tarah tarah ke khādimoñ se nawāzā. Bāz rasūl, bāz nabī, bāz mubashshir, bāz charwāhe aur bāz ustād hain. ¹² In kā maqsad yih hai ki muqaddasīn ko khidmat karne ke lie taiyār kiyā jāe aur yoñ Masīh ke badan kī tāmīr-o-taraqqī ho jāe. ¹³ Is tarīqe se ham sab īmān aur Allāh ke Farzand kī pahchān meñ ek ho kar bālīgh ho jāeñge, aur ham mil kar Masīh kī māmūrī aur balūghat ko mun'akis kareñge. ¹⁴ Phir ham bachche nahīñ raheñge, aur tālīm ke har ek jhoñke se uchhalte phirte nahīñ raheñge jab log apnī chālākī aur dhokebāzī se hameñ apne jāloñ meñ phañsāne kī koshish kareñge. ¹⁵ Is ke bajāe ham muhabbat

kī rūh meñ sachchī bāt karke har lihāz se Masīh kī taraf baṛhte jāēnge jo hamārā sar hai. ¹⁶ Wuhī nasonī ke zariye pūre badan ke mukhtalif hissoñ ko ek dūsre ke sāth joṛ kar muttahid kar detā hai. Har hissā apnī tāqat ke muwāfiq kām kartā hai, aur yoñ pūrā badan muhabbat kī rūh meñ baṛhtā aur apnī tāmīr kartā rahtā hai.

Masīh meñ Naī Zindagī

¹⁷ Pas maiñ Khudāwand ke nām meñ āp ko āgāh kartā hūn ki ab se ġhairīmāndāronī kī tarah zindagī na guzāreñ jin kī soch bekār hai ¹⁸ aur jin kī samajh andhere kī girift meñ hai. Un kā us zindagī meñ koī hissā nahīn jo Allāh detā hai, kyoñki wuh jāhil haiñ aur un ke dil sakht ho gae haiñ. ¹⁹ Behis ho kar unhoñ ne apne āp ko aiyāshī ke hawāle kar diyā. Yoñ wuh na bujhne wālī pyās ke sāth har qism kī nāpāk harkateñ karte haiñ.

²⁰ Lekin āp ne Masīh ko yoñ nahīn jānā. ²¹ Āp ne to us ke bāre meñ sun liyā hai, aur us meñ ho kar āp ko wuh sachchāī sikhāī gaī jo Īsā meñ hai. ²² Chunāñche apne purāne insān ko us ke purāne chāl-chalan samet utār denā, kyoñki wuh apnī dhonebāz shahwatoñ se bigartā jā rahā hai. ²³ Allāh ko āp kī soch kī tajdīd karne deñ ²⁴ aur nae insān ko pahan leñ jo yoñ banāyā gayā hai ki wuh haqīqī rāstbāzī aur quddūsiyat meñ Allāh ke mushābeh hai.

²⁵ Is lie har shañhs jhūṭ se bāz rah kar dūsroñ se sach bāt kare, kyoñki ham sab ek hī badan ke āzā haiñ. ²⁶ Ĝhusse meñ āte waqt gunāh mat karnā. Āp kā ġhussā sūraj ke ġhurūb hone tak

ṭhandā ho jāe, ²⁷ warnā āp Iblīs ko apnī zindagī meñ kām karne kā mauqā deñge. ²⁸ Chor ab se chorī na kare balki կhūb mehnat-mashaqqat karke apne hāthoñ se achchhā kām kare. Hāñ, wuh itnā kamāe ki zarūratmandoñ ko bhī kuchh de sake. ²⁹ Koi bhī buri bāt āp ke muñh se na nikle balki sirf aisī bāteñ jo dūsroñ kī zarūriyāt ke mutābiq un kī tāmir karen. Yoñ sunane wāloñ ko barkat milegī. ³⁰ Allāh ke muqaddas Rūh ko dukh na pahuñchānā, kyoñki usī se Allāh ne āp par muhr lagā kar yih zamānat de dī hai ki āp usī ke hain aur najāt ke din bach jāeñge. ³¹ Tamām tarah kī talkhī, taish, ġhusse, shor-sharābā, gālī-galoch balki har qism ke bure rawaiye se bāz æñ. ³² Ek dūsre par mehrbān aur rahmdil hoñ aur ek dūsre ko yoñ muāf karen jis tarah Allāh ne āp ko bhī Masīh meñ muāf kar diyā hai.

5

Raushnī meñ Zindagī Guzārnā

¹ Chūñki āp Allāh ke pyāre bachche hain is lie us ke namūne par chaleñ. ² Muhabbat kī rūh meñ zindagī yoñ guzāren jaise Masīh ne guzārī. Kyoñki us ne ham se muhabbat rakh kar apne āp ko hamāre lie Allāh ke huzūr qurbān kar diyā aur yoñ aisī qurbānī ban gayā jis kī կhushbū Allāh ko pasand āī.

³ Āp ke darmiyān zinākārī, har tarah kī nāpākī yā lālach kā zikr tak na ho, kyoñki yih Allāh ke muqaddasīn ke lie munāsib nahīñ hai. ⁴ Isī tarah sharmnāk, ahmaqānā yā gandī bāteñ bhī

thīk nahīn. In kī jagah shukrguzārī honī chāhie.
⁵ Kyońki yaqīn jāneń ki zinākār, nāpāk yā lālchī Masīh aur Allāh kī bādshāhī meń mīrās nahīn pāeńge. (Lālach to ek qism kī butparastī hai.)

⁶ Koī āp ko bemānī alfāz se dhokā na de. Aisī hī bāton kī wajah se Allāh kā ghazab un par jo nāfarmān haiń nāzil hotā hai. ⁷ Chunāñche un meń sharīk na ho jāeń jo yih karte haiń. ⁸ Kyońki pahle āp tārīkī the, lekin ab āp Khudāwand meń raushnī hain. Raushnī ke farzand kī tarah zindagī guzāreń, ⁹ kyońki raushnī kā phal har tarah kī bhalāī, rāstbāzī aur sachchāī hai. ¹⁰ Aur mālūm karte raheń ki Khudāwand ko kyā kuchh pasand hai. ¹¹ Tārīkī ke bephal kāmoń meń hissā na leń balki unheń raushnī meń lāeń. ¹² Kyońki jo kuchh yih log poshīdagī meń karte haiń us kā zikr karnā bhī sharm kī bāt hai. ¹³ Lekin sab kuchh beniqāb ho jātā hai jab use raushnī meń lāyā jātā hai. ¹⁴ Kyońki jo raushnī meń lāyā jātā hai wuh raushan ho jātā hai. Is lie kahā jātā hai,

“Ai sone wāle, jāg uṭh.

Murdoń meń se jī uṭh,
 to Masīh tujh par chamkegā.”

¹⁵ Chunāñche bařī ehtiyāt se is par dhyān deń ki āp zindagī kis tarah guzārte haiń—besamajh yā samajhdār logoń kī tarah. ¹⁶ Har mauqe se pūrā fāydā uṭhāeń, kyońki din bure haiń. ¹⁷ Is lie ahmaq na baneń balki Khudāwand kī marzī ko samjheń.

¹⁸ Sharāb meń matwāle na ho jāeń, kyońki is kā anjām aiyāshī hai. Is ke bajāe Rūhul-quds se māmūr hote jāeń. ¹⁹ Zabūroń, hamd-o-sanā aur ruhānī gītoń se ek dūsre kī hauslā-afzāī kareń.

Apne dilon meń Khudāwand ke lie gīt gāeń aur naǵhmāsarāí kareń. ²⁰ Hāń, har waqt hamāre Khudāwand Īsā Masīh ke nām meń har chīz ke lie shukr kareń.

Miyāń-Bīwī kā Tällua

²¹ Masīh ke khauf meń ek dūsre ke tābe raheń. ²² Bīwiyo, jis tarah āp Khudāwand ke tābe hain usī tarah apne shauhar ke tābe bhī raheń. ²³ Kyońki shauhar waise hī apnī bīwī kā sar hai jaise Masīh apnī jamāt kā. Hāń, jamāt Masīh kā badan hai jise us ne najāt dī hai. ²⁴ Ab jis tarah jamāt Masīh ke tābe hai usī tarah bīwiyāń bhī apne shauharoń ke tābe raheń.

²⁵ Shauharo, apnī bīwiyoń se muhabbat rakheń, bilkul usī tarah jis tarah Masīh ne apnī jamāt se muhabbat rakh kar apne āp ko us ke lie qurbān kiyā ²⁶ tāki use Allāh ke lie maķhsūs-o-muqaddas kare. Us ne use kalām-e-pāk se dho kar pāk-sāf kar diyā ²⁷ tāki apne āp ko ek aisī jamāt pesh kare jo jalālī, muqaddas aur be'ilzām ho, jis meń na koī dāgħ ho, na koī jhurri, na kisī aur qism kā nuqs. ²⁸ Shauharoń kā farz hai ki wuh apnī bīwiyoń se aisī hī muhabbat rakheń. Hāń, wuh un se waisī muhabbat rakheń jaisī apne jism se rakhte haiń. Kyońki jo apnī bīwī se muhabbat rakhtā hai wuh apne āp se hī muhabbat rakhtā hai. ²⁹ Ākhir koī bhī apne jism se nafrat nahīń kartā balki use ķhurāk muhaiyā kartā aur pāltā hai. Masīh bhī apnī jamāt ke lie yihī kuchh kartā hai. ³⁰ Kyońki ham us ke badan ke āzā haiń. ³¹ Kalām-e-muqaddas meń bhī likhā hai, “Is lie mard apne mān-bāp ko chhoṛ

kar apnī bīwī ke sāth paiwast ho jātā hai. Wuh donoñ ek ho jāte hain.” ³² Yih rāz bahut gahrā hai. Maiñ to us kā itlāq Masīh aur us kī jamāt par kartā hūn. ³³ Lekin is kā itlāq āp par bhī hai. Har shauhar apnī bīwī se is tarah muhabbat rakhe jis tarah wuh apne āp se rakhtā hai. Aur har bīwī apne shauhar kī izzat kare.

6

Bachchoñ aur Wālidain kā Tälluq

¹ Bachcho, Khudāwand meñ apne mān-bāp ke tābe raheñ, kyoñki yihī rāstbāzī kā taqāzā hai.

² Kalām-e-muqaddas meñ likhā hai, “Apne bāp aur apnī mān kī izzat karnā.” Yih pahlā hukm hai jis ke sāth ek wādā bhī kiyā gayā hai, ³ “Phir tū khushhāl aur zamīn par der tak jītā rahegā.”

⁴ Ai wālido, apne bachchoñ se aisā sulūk mat karen ki wuh ǵhusse ho jāeñ balki unheñ Khudāwand kī taraf se tarbiyat aur hidāyat de kar pāleñ.

Ĝhulām aur Mālik

⁵ Ĝhulāmo, ḍarte aur kāñpte hue apne insānī mālikoñ ke tābe raheñ. Khulūsdili se un kī khidmat yoñ karen jaise Masīh kī. ⁶ Na sirf un ke sāmne hī aur unheñ khush rakhne ke lie khidmat karen balki Masīh ke ġhulāmoñ kī haisiyat se jo pūrī lagan se Allāh kī marzī pūrī karnā chāhte hain. ⁷ Khushī se khidmat karen, is tarah jaisā ki āp na sirf insānoñ kī balki Khudāwand kī khidmat kar rahe hoñ. ⁸ Āp to jānte hain ki jo bhī achchhā kām ham ne kiyā us kā ajr Khudāwand degā, kħāh ham ġhulām hoñ

yā āzād. ⁹ Aur māliko, āp bhī apne ġhulāmoṇ se aisā hī sulūk kareṇ. Unheṇ dhamkiyāṇ na deṇ. Āp ko to mālūm hai ki āsmān par āp kā bhī mālik hai aur ki wuh jānibdār nahīṇ hotā.

Ruhānī Zirābaktar

¹⁰ Ek ākhirī bāt, Khudāwand aur us kī zabardast quwwat meṇ tāqatwar ban jāeṇ. ¹¹ Allāh kā pūrā zirābaktar pahan len tāki Iblīs kī chāloṇ kā sāmnā kar sakeṇ. ¹² Kyoṇki hamārī jang insān ke sāth nahīṇ hai balki hukmrānoṇ aur ikhtiyār wāloṇ ke sāth, is tārik duniyā ke hākimoṇ ke sāth aur āsmānī duniyā kī shaitānī kuwwatoṇ ke sāth hai. ¹³ Chunānche Allāh kā pūrā zirābaktar pahan len tāki āp musībat ke din Iblīs ke hamloṇ kā sāmnā kar sakeṇ balki sab kuchh saranjām dene ke bād qāy়m rah sakeṇ.

¹⁴ Ab yoṇ khare ho jāeṇ ki āp kī kamr meṇ sachchāī kā paṭkā bandhā huā ho, āp ke sīne par rāstbāzī kā sīnāband lagā ho ¹⁵ aur āp ke pāñwoṇ meṇ aise jūte hoṇ jo sulah-salāmatī kī khushkhabrī sunāne ke lie taiyār raheṇ. ¹⁶ Is ke alāwā īmān kī dhāl bhī uṭhāe rakheṇ, kyoṇki is se āp Iblīs ke jalte hue tīr bujhā sakte haiṇ. ¹⁷ Apne sar par najāt kā khod pahan kar hāth meṇ Rūh kī talwār jo Allāh kā kalām hai thāme rakheṇ. ¹⁸ Aur har mauqe par Rūh meṇ har tarah kī duā aur minnat karte raheṇ. Jāgte aur sābitqadmi se tamām muqaddasīn ke lie duā karte raheṇ. ¹⁹ Mere lie bhī duā kareṇ ki jab bhī maiṇ apnā muñh kholūn Allāh mujhe aise alfaz atā kare ki pūrī dilerī se us kī khushkhabrī kā rāz sunā sakūn. ²⁰ Kyoṇki maiṇ isī paiğhām kī

ਖਾਤਿਰ ਕਾਇਦੀ, ਹਾਨੀ ਜਾਂਜਿਰੀ ਮੈਨ ਜਾਕਾਰਾ ਹੁਅ ਮਾਸਿਹ
ਕਾ ਏਲਚੀ ਹੁਨੀ। ਦੂਅ ਕਾਰੋਂ ਕਿ ਮਾਨ ਮਾਸਿਹ ਮੈਨ ਉਤਨੀ
ਦਿਲੇਰੀ ਸੇ ਧਿਆਨ ਪਾਇਗਹਾਮ ਸੁਨਾਉਣੀ ਜਿਤਨਾ ਮੁਜ਼ਹੇ ਕਾਰਨਾ
ਚਾਹੀਏ।

Ākhirī Salām

²¹ ਆਪ ਮੇਰੇ ਹਾਲ ਅਤੇ ਕਾਮ ਕੇ ਬਾਰੇ ਮੈਨ ਭਿੰ
ਜਾਨਾਵਾਂ ਚਾਹੇਂਗੇ। ਖੁਦਾਵਾਂ ਮੈਨ ਹਮਾਰਾ
ਅਤੀਝ ਭਾਈ ਅਤੇ ਵਾਫਾਦਾਰ ਖਾਦਿਮ ਤੁਖਿਕੁਸ ਆਪ ਕੇ
ਧਿਆਨ ਸਾਬ ਕੁਝ ਬਾਤਾਂ ਦੇਗਾ। ²² ਮਾਨ ਨੇ ਉਸੇ ਇਸੀ ਲੀਏ
ਆਪ ਕੇ ਪਾਸ ਬਹੇਜ ਦਿਯਾ ਕਿ ਆਪ ਕੇ ਹਮਾਰੇ ਹਾਲ ਕਾ ਪਤਾ
ਚਾਲੇ ਅਤੇ ਆਪ ਕੇ ਤਸਾਲੀ ਮਿਲੇ।

²³ ਖੁਦਾ ਬਾਪ ਅਤੇ ਖੁਦਾਵਾਂ ਇਸਾ ਮਾਸਿਹ ਆਪ
ਭਾਈਓਂ ਕੇ ਸਾਲਾਮਤੀ ਅਤੇ ਇਮਾਨ ਕੇ ਸਾਥ ਮੁਹਾਬਤ
ਅਤਾਂ ਕਾਰੋਂ। ²⁴ ਅਲਾਹ ਕਾ ਫਾਝਲ ਅਤੇ ਸਾਬ ਕੇ ਸਾਥ ਹੋ
ਜੋ ਅਨਮਿਤ ਮੁਹਾਬਤ ਕੇ ਸਾਥ ਹਮਾਰੇ ਖੁਦਾਵਾਂ
ਇਸਾ ਮਾਸਿਹ ਕੇ ਪ੍ਰਾਪਤ ਕਰਦੇ ਹਨ।

**Kitab-i Muqaddas
The Holy Bible in Urdu, Urdu Geo Version, Roman
Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30